

Revisiun totala dalla planisaziun locala

Part dils habitadis (Plans 1:2000)
e lescha da baghegiar

M E S S A D I

dalla suprastanza communal al cussegli da vischnaunca

Stimau signur president
Stimadas signuras cusseglieras
Prezai signurs cussegliers

1. Introducziun

Ils 3 da mars 2013 ha la populaziun Svizra approbau la revisiun parziale della lescha federala davant il svilup dil territori (RPG). Cun quella revisiun duei la destructureziun (Zersiedlung) della surfatscha da baghegiar vegnir frenada. La revisiun duei retener il surdiever da terren, garantir in svilup da colonisaziun cumpact cun mantener la Svizra sco liug attractiv da habitar e da laver.

Cun caschun dalla vigur legala della revisiun parziale della lescha federala davant il svilup (RPG1) dil territori igl 1. da matg 2014 ein las cundiziuns da rama pertucont il dretg da planisaziun semidadas eclatantamein.

La revisiun RPG1 ha per finamira, da frenar l'extensiun dallas zonas da baghegiar el spazi da terren agricol e da promover il svilup da baghegiar anenviars ellas zonas da baghegiar existentas. Primarmein eis ei necessari da definir, respectivamein reducir la grondezia dallas zonas baghegiar sil basegns dils proxims 15 onns, cun mobilisar las reservas necessarias. La finamira da RPG 1 ei da scaffir habitatdis cumpacts cun in'utilisaziun ed in'avvertura cumpacta, entras observar respectivamein scaffir spazis da buna qualitad.

Quest messadi resumescha ils puncts impurtonts dalla revisiun totala dalla planisaziun locala. Il rapport da planisaziun circumscriva igl entir decuors dil process da planisaziun ed ils cuntegns da quella revisiun totala detagliadamein.

2. Motiv per ina revisiun totala

Avon biabein 15 onns, igl onn 2008 ha la vischnaunca da Mustér revediu la davosa gada totalmein la planisaziun locala. Dapi la davosa revisiun totala han giu liug pliras revisiuns parzialas. In'examinaziun generala ha buca giu liug dapi lu. Planisaziuns localas ein per regla d'examinar mintga 10 entochen 15 onns e d'adattar cuntuadamein allas relaziuns semidadas. Suandontas raschuns d'impurtonza han menau la vischnaunca tier in'examinaziun dalla planisaziun locala e la conclusiun ch'ina revisiun totala seigi opportuna:


- La planisaziun locala sto vegin adattada allas pretensiuns novas dalla legislaziun federala davart il svilup dil territori (RPG1), dil plan directiv cantunal da colonisaziun (KRIP-S) e dalla lescha cantunala davart il svilup dil territori (LPTGR). Zonas da baghegiar han perquei da satisfar al basegns dils proxims 15 onns, zonas da baghegiar surdimensiunadas ston vegin redimensiunadas.
- Risguardond las pretensiuns dalla Confederaziun e dil cantun eisi d'instradar mesiras per promover in svilup dils habitatdis anenviars, specialmein cun mesiras per mobilisar terren da baghegiar e cun segirar in'utilisaziun adequata dil terren da baghegiar avon maun.
- La planisaziun locala sto vegin adattada als basegns ed il svilup territorial dalla vischnaunca el senn dil maletg directiv communal dil territori (MDT).
- La lescha da baghegiar sto vegin revedida totalmein e coordinada cun la lescha cantunala davart il svilup dil territori cun adattar quella al dretg da planisaziun.

La presenta revisiun dalla planisaziun locala cumpeglia aschia tuts aspects per realisar las pretensiuns dil plan directiv cantunal da colonisaziun. Cun la revisiun dalla planisaziun locala dispona la vischnaunca da Disentis/Mustér d'ina planisaziun adequata al temps ed al dretg surordinatu.

3. Organisaziun

Ils mieds da planisaziun ein vegni elaborai entras ina gruppa da laver da 9 persunas. Alla gruppa da laver han fatg part, il president communal, il cau dil departament, commembres dil cussegli da vischnaunca, il menader infrastructura e baghegiar e differents representants dil fatg ord il miez da vischinas e vischins. Suenter ch'il project ei vegnius preexaminaus entras ils uffecis cantunals ha la suprastanza communal deliberau il sboz per la planisaziun locala per mauns dall'exposiziun da cooperaziun. Suenter la secunda exposiziun da cooperaziun e l'examinaziun e tractaziun da tuttas propostas e giavischs ei l'entira documentaziun vegnida deliberada dalla suprastanza communal per mauns dalla tractaziun entras il cussegli da vischnaunca.

L'approbaziun definitiva dil project per la revisiun totala dalla planisaziun locala succeda entras la cuminanza dils votants all'urna. Vigur legala survegn il project da revisiun suenter l'approbaziun entras la Regenza.



Suandontas persunas han collaborau ella cumissiun da planisaziun (gruppa da lavour):

- René Epp, president communal (naven dils 1-1-2021)
- Robert Cajacob, president communal (entochen ils 31-12-2020)
- Wendelin Jacomet, gerau (cau dil departament)
- Mario Flepp, anteriur commember dil cussegl da vischnaunca
- Helga Probst-Linder, anteriura commembra dil cussegl da vischnaunca
- Christian Loretz, cusseglier da vischnaunca (entochen 31-12-2020)
- Pauli Lozza, scrinari da construcziun diplomau e dessignader
- Aluis Flepp, president corporaziun d'aua, Spina da vin
- Iso Mazzetta, inschignier diplomau
- Roland Cajacob, commember dil cussegl da vischnaunca (naven dils 1-1-2021 entochen ils 30-09-2024), naven dils 1-10-2024 meinafatschenta dall'administraziun communal
- Ervin Maissen, menader infrastructura e bagheggiar (entochen ils 31-3-2025)
- Urban Maissen, menader infrastructura e bagheggiar (naven dils 1-4-2025)

4. Procedura

L'elaboraziun dil project ei succedida en suandonts pass:

Approbaziun dil MDT (maletg directiv dil territori)	Q3 2020
Elaboraziun dallas datas da basa ed analisa	Q3 2020 entochen Q4 2020
Elaboraziun dils sbozs, plans e lescha	Q1 2021 entochen Q4 2021
Deliberaziun dils sbozs entras la cumissiun da planisaziun	Q4 2021 entochen Q1 2022
Surluvrar il sboz a basa dallas sedutas dalla cumissiun da planisaziun	Q1 2022 entochen Q2 2022
Preexaminaziun entras ils uffecis cantunals sut l'egida digl uffeci pil svilup dil territori	12-09-2022 entochen ils 27-09-2023
Purificaziun suenter la preexaminaziun entras igl ARE	Q3 2023 entochen Q1 2024
Sera d'informaziun per la populaziun	21 da zercladur 2024
Emprema exposiziun da cooperaziun (60dis)	21-06-2024 entochen ils 20-8-2024
Uras d'audienza	fenadur/uost 2024
Rispunder las objecziuns ord l'exposiziun da cooperaziun cun surluvrar la documentazиun	Q3 2023 entochen Q1 2025
Secunda exposiziun da cooperaziun (30 dis)	21-03-2025 entochen 21-04-2025
Uras d'audienza	Mars/avrel 2025
Rispunder las objecziuns ord l'exposiziun da cooperaziun cun surluvrar la documentazиun	Matg entochen fenadur 2025
Deliberaziun entras la suprastonza communala per mauns dil cussegl da vischnaunca	4 d'uost 2025
Sera d'informaziun per la populaziun ed ils commembres dil cussegl da vischnaunca	22 d'uost 2025
Cussegl da vischnaunca (informaziun e discussiun)	25 d'uost 2025
Cussegl da vischnaunca (approbaziun)	10 da settember 2025
Votaziun all'urna	30 da november 2025
Exposiziun da recuors (30 Tage)	december 2025 / schaner 2026
Silsuenter approbaziun entras la Regenza	

5. Plan da zonas e plan general da formaziun 1:2000

Il plan da zonas ed il plan general da formaziun cumpeglan tut ils habitadis ed ein reparti sin suandonts dus plans:

- Acletta/Funs, Disentis, Faltscharidas, Segnas, Buretsch, Peisel, Cuoz, Mumpé Medel, Clavaniev
- Disla, Cavardiras, Pardomat Dadens, Madernal, Mumpé Tujetsch

Ils plans adattai cuntegnan suandontas tematicas impurtontas:

a) Fixaziun dallas zonas da baghegiar

Tenor la planisaziun vertenta dispona la vischnaunca da Mustér actualmein d'ina reserva da terren da baghegiar ella dimensiun da 10.88 ha zonas da habitar, mischedadas e centralas (WMZ). Quella surfatscha corrispunda a rodund 100'000 m² ni circa 15 piazze da ballapei. Sin quella surfatscha da reserva savess vegnir construui spazi da habitar per ca. 300 habitontas e habitonts. Tenor las indicaziuns digl uffeci federal da statistica cumpeglia il diember permanent dalla populaziun dalla vischnaunca da Mustér mumentan a rodund 2080 habitontas e habitonts.

Las reservas da terren da baghegiar stoncorrispunder al svilup della populaziun dils proxims 15 onns. Las prognosas negativas dils davos onns davart il svilup della populaziun da Mustér digl uffeci da statistica e dils uffecis cantunals ein gest actualisadas e vegnidias adattadas ad in svilup moderau positiv. Las reservas da terren da baghegiar ein perquei vegnidias adattadas moderadamein.

Cun l'actuala revisiun dalla planisaziun locala vegn la surfatscha da reservas da baghegiar WMZ reducida per 1.87ha, aschia ch'ei resta aunc ina reserva da zonas da baghegiar WMZ ella dimensiun da 9.01ha. Tgei che corrispunda ad ina reserva per 308 habitontas e habitonts. La differenza tier la reserva sedat ord il fatg che la cefra d'utilisaziun ei vegnida alzada moderadamein. Ei setracta cheu d'ina calculaziun tecnica, che succeda entras igl uffeci pil svilup dil territori ARE per tuttas vischnauncas tenor ils medems parameters.

Las exzonaziuns, pia l'attribuziun da zonas da baghegiar aunc buca surbaghegiadas tier zonas d'agricultura, succeda dapertut leu, nua che quei fa tenor ils criteris dil dretg da planisaziun senn. Suloms che secattan enteifer quartiers ch'ein per gronda part aviarts e madirs da vegnir surbaghegiai, vegnan buca exzonai, mobein mobilisai.

b) Mobilisaziun da terren da baghegiar

La mobilisaziun da terren da baghegiar ei in impurtont instrument da questa revisiun. Terren en zona da baghegiar ei numnadamein destinaus per vegnir surbaghegiaus. La mobilisaziun da terren da baghegiar ha l'intenziun da prevegnir che terren da baghegiar vegn arcunaus e stat buca a disposiziun pil diever definiu. Las parcelles ch'ein destinadas da vegnir mobilisadas ein indicadas el plan da zonas cun ina schraffura. Tenor schraffura munta il termin da mobilisaziun a 2, 3 ni 8 onns. Il termin per la mobilisaziun entscheiva cun vigur legala entras l'approbaziun dalla Regenza. Vegn il terren buca surbaghegiaus enteifer il termin definiu, sa la vischnaunca exercitar in dretg da cumpra, e quei a basa dalla valeta commerciala. La valeta commerciala vegn definida entras igl uffeci per la valetaziun d'immobilias. La procedura leutier succeda tenor las prescripziuns digl art. 19d LPTGR. El cass che l'obligaziun da mobilisaziun vegn buca ademplida sa la suprastonza communal, sco ulteriura mesira, disponer ch'il schischom vegni relaschaus senza indemnisiatiun ord la zona da baghegiar (art. 19e LPTGR).

Sco mesira supplementara sa la vischnaunca, aschinavon ch'il termin da mobilisaziun vegn buca observaus, incassar ina taxa directiva ella dimensiun dad 1% dalla valeta commerciala. Quella taxa s'augmenta dad onn tier onn per mintgamai 1% entochen maximalmein 10% (art. 14 al. 3 LB). L'obligaziun da surbaghegiada per suloms che secattan actualmein en zona da baghegiar valan per surbaghegiai, sche l'utilisaziun pusseivla ei enteifer il termin da mobilisaziun ademplida per 50%.

El plan da zonas vegnan 94 parcellas ni parts da parcellas ella dimensiun dad 11.4ha mobilisadas. Da quei ein 43% dallas surfatschas suttamessas ad in'obligaziun da surbaghegiada dad 8 onns. Per in tierz dallas surfatschas ei vegniu definiu in termin da 3 onns. En quellas ein, sper las surfatschas en las zonas habitar WMZ, era cunteniu ina surfatscha da rodund 2ha en zonas da mistregn.




fig. 1: Mobilisaziun da terren da baghegiar, surfatschas e termsins

c) Taxa da plivalur tier enzonaziuns

Proprietaris da terren, dils quals lur suloms vegnan da niev zonai entuorn, per exemplu d'ina zona d'agricultura ad ina zona da baghegiar, ein suttamess all'obligaziun da pagar ina taxa da plivalur. L'altezia da quella taxa mutta tier l'enzonaziun a 30% dalla plivalur. La taxa ei da pagar il mument ch'il sulom vegn surbaghegiaus, ni ch'el vegn vendius (art. 19n LPTGR). 75% dalla taxa ei da pagar al cantun, 25% restan tier la vischnaunca en in fondo special (finanziaziun per la compensaziun da plivalur).

Rodund 50 parcellas ein pertuccadas d'ina enzonaziun. 20 da quellas ein effectivamein pertuccadas entras l'obligaziun dalla taxa da plivalur. Plivalurs da sut frs. 20'000.-- ein buca suttamessas alla taxa da plivalur. Las enzonaziuns pertuccan neginas zonas da habitar WMZ, mobein sulettamein zonas da mistregn, zonas per baghetgs pigns e curtins ni zonas per baghetgs e stabiliments publics.




fig. 2: Definiziun ed attribuziun della taxa da plivalur

d) Reducziun dallas reservas da terren da baghegiar

Per saver reducir las reservas da terren sin suloms gronds, parzialmein surbaghegiai, vegnan parts dallas surfatschas attribuidas da niev alla zona per baghetgs pigns e curtins. Tier la zona per baghetgs pigns e curtins settracta ei d'ina zona da baghegiar reducida, ella quala spazi da habitar ei buca pusseivels. In ulteriur effect dalla differenziazion enteifer las zonas ei la formaziun. Ina mesira che duei garantir enteifer ils habitadis, spazis e contuorns libers da valeta qualitativa.

e) Maletgs dil liug

Tenor gl'inventari federal dils loghens cun in maletg dil liug digns da vegnir protegi (Bundesinventar der schützenswerten Ortsbilder der Schweiz / ISOS) ein Cavardiras, Disla e Segnas da muntada naziunala. Las pretensiuns digl ISOS vegnan risguardadas ella planisaziun locala en plirs scalems, sco suonda:

- Las surfatschas, ch'ein vegnidias partidas tier ad in liug cun la finamira da manteniment A (Erhaltungsziel), vegnan definidas el plan general da formaziun sco habitadis generalmein protegi. Quei vul dir, che l'instanza da baghegiar sto vegnir orientada davart il project da baghegiar avon ch'entscheiver a projectar e ch'ei vegn tenor basegns elaborau inventaris dils baghetgs, per aschia haver la basa per pusseivlas adattaziuns vid il baghetg.
- Objects, ch'ein sin fundament d'ina disposiziun cantunala tenor lescha davart la proteciun dalla natira e dalla patria protegi, vegnan marcai specialmein els plans.
- Objects singuls, dils quals la valeta da proteciun ei gia enconuschenta, vegnan defini el plan general da formaziun sco baghetgs protegi e digns da vegnir manteni.
- Ulteriurs objects cun determinaziuns da proteciun, ch'ein cunteni egl inventari communal da Cavardiras, Disla e Segnas.

Per proteger e saver mantener spazis libers vegn definiu enteifer ni agl ur dils habitadis zonas per surfatschas verdas. Las surfatschas sut il vitg da Segnas, ch'ein attribuidas egl inventari dad ISOS cun la finamira da manteniment A (mantener la qualitad dalla surfatscha sco terren per la cultivaziun ni sco tener liber), vegnan definidas cun in scamond da construcziun aulta. Entuorn il vitg da Disla vegn contonschii la medema finamira cun mantener la zona per la protecziun dalla cuntrada. A Cavardiras vegnan agl ur dil vitg, aschibein el sid sco el nord, reservas dalla zona da baghegiar exzonadas, per aschia mantener liber las surfatschas avon il vitg cun la finamira da manteniment A. La medema finamira vegn persequitada a Mumpé Tujetsch entrais exzonaziuns agl ur dalla zona da baghegiar. Ils vischinadi da Mumpé Tujetsch ei tenor il plan directiv cantunal definius sco inventari da muntada regiunala, perquei duein ils contuorns medemamein vegnir teni libers.

6. Resumaziun zonas da baghegiar

Perencunter allas prognosas pli baul sa la vischnaunca da Mustér daniev quintar entochen igl onn 2040 cun in lev augment dalla populaziun. Singulas enzonaziuns en zonas da habitar, zonas mischedadas e centralas (WMZ) ella dimensiun da 3'743 m² succedan en connex cun arrundaziuns da terren da baghegiar ni en connex cun optimar singulas situaziuns. Ei setracta per exemplu da situaziuns per liung da vias, nua ch'il cunfin dalla zona ei vegnius definius al cunfin dalla parcella. Ni da loghens nua ch'il cunfin dalla zona da baghegiar ei vegnius adattaus al cunfin dalla zona da prighel 1. Ulteriuras enzonaziuns che pertuccan buca zonas da habitar (WMZ), ein p.ex. davos claustra, nua ch'ins ha enzonau ina surfatscha ella zona per stabiliments ed edifecis publics, per realisar in stabiliment solar.

Cun questa revisiun dalla planisaziun locala tschercan ins buca la finamira da scaffir capacitads supplementaras da terren da baghegiar. Primarmein vul ins promover la mobilisaziun dallas reservas da terren da baghegiar ch'ein avon maun. Quei era cugl intent da prevegnir ch'il cantun pretendi che la vischnaunca exzoneschi ulteriuras surfatschas en zona da baghegiar e sminueschi aunc pli fetg las reservas da terren da baghegiar. Las reservas da terren da baghegiar sepresentan suenter che las zonas da baghegiar ein vegnidias surluvradas suandontamein.

Bilanza WMZ	Surfatscha en ha
Reservas actualas dallas zonas da baghegiar (14-03-2025)	13.36
Reservas actualas dallas zonas da baghegiar WMZ (14-03-2025)	10.88
Dezonaziun da zonas da baghegiar	-5.52
Enzonaziuns en zonas da habitar WMZ	+0.37
Zonar entuorn surfatschas da zonas da baghegiar buca surbaghegiadas en zonas da habitar	+0.38
Zonar entuorn zonas da habitar en zonas ordeifer zonas da habitar WMZ (zona da baghegiar reducida)	-4.38
Surfatscha dallas zonas da habitar WMZ buca surbaghegiadas a basa dalla revisiun (UEB)	9.01

fig. 3: las reservas dallas zonas da habitar cumpeglian ussa aunc 9.01 ha surfatschas buca surbaghegiadas. Las reservas han saviu vegnir reducidas per rodund 2 ha.

Las cefras indicadas en sura tabella ein cumperagliar sco cefras singulas. Las cefras san perquei buca vegnir summadas.

7. Lescha da baghegiar

Muort las novas prescripcions cantunales (plan directiv cantunal habitadis KRIP-S) e la revisiun totala dil plan da zonas e dil plan general da formaziun sto la lescha da baghegiar communal vegnir revedida totalmein. Denton san biaras determinaziuns ch'ein tenor dretg vertent secumprovadas vegnir surpridas ella lescha da baghegiar revedida. Da niev vegn reglau specialmein suandonts aspects.

- Art. 5: La vischerna ha relaschau in niev uorden das fatschentas per la suprastanza communal e per l'organisaziun operativa. Las cumpetenzas vegnan definidas tenor il niev uorden.
- Art. 12-18: Cheu vegnan las prescripcions davart la mobilisaziun da terren da baghegiar e davart l'ulivaziun dalla plivalur regladas, aschinavon che quellas ein tenor dretg cantunal buca gia determinadas.
- Art. 22: Ellas zonas da habitar H1, H2, H3 e H4 sco era elllas zonas da habitar mischedadas HM2 e HM3 vegn la cefra d'utilisaziun alzada per mintgamai 0.05. Quei alzament seresulta perquei che la calculaziun dalla surfatscha utilisabla succeda da niev tenor las prescripcions digl art. 37a OPTGR (ordinaziun cantunala davart il svilup dil territori) e dalla norma SIA 416. Cun alzar moderatamein la cefra d'utilisaziun vegnan quellas surfatschas cumpensadas.
- Art. 22: Ellas zonas da habitar e las zonas da habitar mischedadas vegnan las altezias da fatschada augmentadas per mintgamai 20cm per alzada, aschia muntan las altezias da fatschada per la zona H1 a 5.90m, tier las zonas H2 e HM2 a 8.60m, tier las zonas H3 e HM3 ad 11.80m ed ella zona H4 a 14.00m. Cun quell'adattaziun vegn teniu quen al fatg, che las altezias dallas singulas alzadas ein oz per regla pli aultas che pli baul, quei denter auter era perquei ch'ils plantschius cuntegnan oz dapli installaziuns ed ein entras quei pli gross.
- Art. 23, annexa 2: Las surfatschas che han apparteniu entochen oz alla zona da baghegiar e che vegnan da niev tangadas parzialmein entras la zona da prighel 1 ston vegni exzonadas, la reducziun da quellas surfatschas vegn cumpensada. L'utilisaziun da quella surfatscha vegn tenida a quen alla surfatscha restonta ch'appartegn vinavon alla zona da baghegiar.
- Art. 24: Il diever economic dil terren da baghegiar garantescha, ch'il terren da baghegiar vegn nezegiaus spargnusamein. Vegn nezegiau e realisau pli pauc che 80% dall'utilisaziun pusseivla d'ina parcella, eis ei da cumprovar, co l'utilisaziun restonta savess vegnir realisada en ina etappa da baghegiar futura. In'engrondazion sa vegnir cumprovada enten alzar in baghetg, entras la construcziun d'in baghetg annex ni entras baghetgs supplementars. Cheutras duein era generaziuns vegnentas saver disponer dalla pusseivladad da baghegiar.
- Art. 30 e 31: Enteifer la zona centrala e la zona dil vitg sa l'instancia da baghegiar en cass motivai consultar la cussegliaziun da baghegiar.
- Art. 38: La nova zona speciala Clavaniev garantescha la substansa ed il diever dils clavaus e nuegls existents.
- Art. 34, 43 e 65: La midada da zonas tier las parcelas 1594, 859 e 2204 preveda da reservar ina cumpart dalla surfatscha utilisabla per la construcziun da habitaziuns pintgas.
- Art. 40: Enteifer la zona da mistregn duess ei esser pusseivel da realisar per scadin menaschi spazi da habitar da pichet per saver possibiliter la preschientscha indispensabla d'ina persuna. La necessitat dil spazi da habitar sto vegnir cumprovada el rom dalla procedura da baghegiar.
- Art. 74: Da niev vegn definiu in spazi per ina casa per in menaschi agricol, per aschia possibiliter la construcziun d'ina casa da habitar ch'ei colligiada cul menaschi agricol.
- Ulteriuras adattaziuns ein succedidas sin fundament dallas propostas ch'ein seresultadas ord las exposiziun da cooperaziun.

7. Ponderaziuns finalas

Cun l'approbaziun dalla revisiun totala della planisaziun locala, dil plan da zonas e plan general da formaziun – eis ei pusseivel da crear la segirtad necessaria da dretg pils proprietaris da terren, pils patruns da baghegiar, per l'instanza da baghegiar e pils vischins directamein pertuccai. Cun la reducziun dallas zonas da baghegiar sa vegnir dau suatientscha allas pretensiuns dil dretg da planisaziun surordinau. Medemamein vegn mantenu la pusseivladad da svilup en vischnaunca. Ei setracta aschia d'in project da votaziun equilibrau, nua ch'ins ei sespruaus da risguardar aschi bein sco pusseivel ils giavischs dils pertuccai sco era cun observar ils interess publics.

8. Proposta

Sin fundament dallas ponderaziun suramenziunadas

propona

la suprastonza communal al cussegli da vischnaunca:

1. D'aprobar la revisiun totala della planisaziun locala concernent
 - a. il plan da zonas e plan general da formaziun 1:2000 Acletta/Funs, Disentis, Faltscharidas, Segnas, Buretsch, Peisel, Cuoz, Mumpé Medel, Clavaniev;
 - b. il plan da zonas e plan general da formaziun 1:2000 Disla, Cavardiras, Pardomat Dadens, Madernal, Mumpé Tujetsch e
 - c. la lescha da baghegiar.
2. Da suttametter il conclus dil cussegli da vischnaunca el senn dallas prescripziuns digl art. 48 al. 1 dalla lescha cantunala da planisaziun dil territori e digl art. 11 al. 1 dalla lescha da baghegiar alla cumionza dils votants.

Suprastonza communal Disentis/Mustér
Il president:

René Epp

Il meinafatschenta:

Roland Cajacob

Disentis/Mustér, ils 4 d'uost 2025

- Plan da zonas e plan general da formaziun 1:2000 Acletta/Funs, Disentis, Faltscharidas, Segnas, Buretsch, Peisel, Cuoz, Mumpé Medel, Clavaniev
- Plan da zonas e plan general da formaziun 1:2000 Disla, Cavardiras, Pardomat Dadens, Madernal, Mumpé Tujetsch
- Lescha da baghegiar
- Rapport da planisaziun revisiun parziala Teil Siedlung mit Anhang und Beilagen